

- मुख्यमंत्री भजनलाल शर्मा विधायक निधि मांय भ्रष्टाचार री छाप्योडी खबर माथे संज्ञान लियो-मामला री उच्च स्तरीय जांच रा हुकम दिया।
- मौजूदा राज्य सरकार रा कार्यकाल रा दो बरस काले पूरा हो रिया है- प्रदेशभर मांय आरोग्य शिविरां रो आयोजन।
- राष्ट्रपति द्रौपदी मुर्मू ऊर्जा संरक्षण ने आज री बकत री महति जरूरत बतायो।
- प्रधानमंत्री नरेन्द्र मोदी काले सूं चार दिन रा विदेश दौरे माथे।

0000

मुख्यमंत्री भजनलाल शर्मा आज एक खास समाचार पत्र माथे विधायक निधि मांय भ्रष्टाचार री छाप्योडी खबर माथे संज्ञान लेवता थकां मामले री उच्च स्तरीय जांच रा हुकम दिया है। मुख्यमंत्री इण मामला मांय मुख्य सचिव अर पुलिस महानिदेशक अर राज्य रा मुख्य सतर्कता आयुक्त री अध्यक्षता मांय गठित समिति ने इण री विगतवार जांच करण रा हुकम दिया ज्या है। इण रे साथे ही आं विधानसभा खेतरां मांय **विधायक निधि** रे खाता फ्रीज करणे रो कह्यो है। इण बीचे विधानसभा अध्यक्ष वासुदेव देवनानी कयो है कि जनप्रतिनिधियां खातिर निजी जीवन मांय शुचिता अर ईमानदारी सब सूं ऊंची है। राज्य रा तीन विधायकां माथे विधायक निधि जारी करणे रे बदले कथित तौर माथे कमिशन लेणे रा स्टिंग सामने आणे पर प्रतिक्रिया देवता थकां श्री देवनानी कयो कि ओ प्रकरण घणो गंभीर अर चिंताजनक है इण री जांच करवार दोषियां रे खिलाफ करडी कार्रवाई करी जावेली।

000

ध्यानजोग है कि इण समाचार मांय राज्य रा तीन विधायकां माथे एम.एल.ए. फंड री रकम जारी करणे रे बदले कथित तौर माथे कमीशन मांगणे री बात सामे आई ही।

000

मुख्यमंत्री भजनलाल शर्मा कयो है के स्वच्छता समाज अर सरकार री साझा जिम्मेदारी है। प्रदेशवासियां ने स्वच्छता योद्धावां रो सम्मान अर सहयोग कर आं रो मनोबल बधाणो चाहिजे, ताकि वे स्वच्छता री मुहिम मांय और बेहतर तरीके सूं काम कर सके। मुख्यमंत्री आज जयपुर मांय राज्य स्तरीय स्वच्छता, जागरुकता अर श्रमदान कार्यक्रम मांय बोल रिया हा। जलमहल री पाळ माथे व्हीया इण कार्यक्रम मांय मुख्यमंत्री प्रदेशवासियां सूं सिंगल यूज प्लास्टिक रो इस्तेमाल नी करणे रो हेलो कर्यो।

.000

मुख्यमंत्री इण मौके माथे श्रमदान अर पौधरोपण कर स्वच्छता रो संदेश दियो। साथे ही वठे आया जन समूह ने स्वच्छता री शपथ भी दिलाई। श्री शर्मा स्वच्छता योद्धावां ने पीपीई किट अर चुण्योडा लाभार्थियां ने **पीएम स्वनिधि योजना** रा चैक बांट्या। इण रे अलावा रोड स्वीपिंग मशीन ने हरी झंडी दिखाकर रवाना कर्यो।

खबरनवीसा सूं बणतळ मांय मुख्य सचिव वी. श्रीनिवास कयो कि आपरी धरोहरां अर सार्वजनिक जगावां ने साफ-सुथरो बणाये राखणो हर जिम्मेदार नागरिक रो फर्ज है। वणा कयो के आवण वाळा बकत मांय शहर मांय **मैकेनाइज्ड स्वीपिंग व्यवस्था** ने ले र बैठक करी जावेली।

000

प्रदेशभर मांय जिला स्तर रा स्वच्छता कार्यक्रम राख्या गया। इण मांय आम लोगां री सक्रिय भागीदारी रही अर न्यारी-न्यारी सार्वजनिक जगावां माथे लोगां ने श्रमदान कर स्वच्छता बणाये राखणे रो संदेश दियो।

000

मुख्यमंत्री भजनलाल शर्मा री अगुवाई वाळी मौजूदा राज्य सरकार रे कामकाज ने काले दो बरस पूरा व्हे रिया है। इण उपलक्ष मांय प्रदेशभर मांय **नव उत्थान-नई पहचान, बढ़ता राजस्थान-हमारा राजस्थान**, थीम माथे कार्यक्रम राख्या जा रिया है। इणी कडी मांय सरकार री उपलब्धियां अर नीतियां विकास रथां रे माध्यम सूं जनता ताई पहुंचाई जा री है। कार्याक्रमां री श्रृंखला मांय काले प्रदेशभर मांय आरोग्य शिविर राख्या जावेली। ऐ शिविर सगळा जिला, उपजिला, सैटेलाईट अर दूजा स्वास्थ्य केन्द्रां माथे लगाया जावेली।

000

प्रदेश मांय 16 दिसम्बर सूँ शहरी समस्या समधान शिविर राख्या जावेला। 24 दिसम्बर ताई चालण वाळा आं शिविरां मांय शहरी नागरिकां री समस्यावां रा तुरत अर प्रभावी निपटारा रा जतन कर्या जावेला। नगरीय विकास अर आवासन विभाग रा प्रमुख शासन सचिव देवाशीष पृष्ठी बतायो के हर नगरीय निकाय अर प्राधिकरण माथे ऐ शिविर जरूरी रूप सूँ राख्या जावेला। बणा बतायो के आं मांय लम्बित मामलां रे साथे-साथे नुवा आवेदनां रा भी मौके माथे ही निपटारो करणे रो जतन कर्यो जावेला। इण मांय शहरी सेवा शिविरां रा तैत दी गई सगळी छूट अर रियायतां लागू रहवेली।

000

राष्ट्रपति द्रौपदी मुर्मू कयो है कि बचत करीजी ऊर्जा री हर इकाई प्रकृति रे प्रति आपणी जिम्मेदारी अर भविष्य खातिर संवेदनशीलता री परिचायक है। श्रीमती मुर्मू आज नुवी दिल्ली मांय राष्ट्रीय ऊर्जा संरक्षण दिवस रे मौके माथे राखी ज्या जळसा मांय बोल रिया हा। राष्ट्रपति कयो के देश मांय ऊर्जा संरक्षण अर स्वच्छ ऊर्जा परिवर्तन खातिर केई खास कदम उठाय ग्या है। भारत तैय बकत सूँ पेल्यां ही स्वच्छ ऊर्जा खातिर प्रतिबद्धता ने पूरो कर्यो है। आ उन्नत ऊर्जा दक्षता अर कार्बन उत्सर्जन कम करणे री दिशा मांय खास उपलब्धि है।

000

राष्ट्रपति ऊर्जा संरक्षण पुरस्कार प्रदान कर्या। वणा इण उपलक्ष मांय राखी ज्या राष्ट्रीय चित्रकारी होड रा विजेतावां ने भी सम्मानित कर्यो। इण होड मांय देश रा 1 लाख 10 हजार स्कूलां रा 83 लाख पढेसरियां री भागीदारी रही।

000

प्रधानमंत्री नरेन्द्र मोदी काल चार दिन रा विदेश दौरा माथे रवाना व्हेला। आपरी यात्रा रे पहले चरण मांय प्रधानमंत्री जॉर्डन पहुंचेला। श्री मोदी जॉर्डन रे किंग अब्दुल्लाह द्वितीय बिन अल हुसैन रा न्यौता माथे दो दिन रे प्रवास माथे रहवेल। प्रधानमंत्री री आ यात्रा दोन्यू देशां रे बीच राजनयिक संबंधां रा 75 साल पूरा होणे रे उपलक्ष मांय हो री है। श्री मोदी इथोपिया अर ओमान की भी यात्रा करेला।

000

जोधपुर मांय काले सूँ हथकरघा उद्यमिता कार्यक्रम री सरूआत हो री है। भारतीय हथकरघा प्रौद्योगिकी संस्थान-आई.आई.एच.टी. री कानी सूँ इण पांच दिवसीय कार्यक्रम मांय हथकरघा खेतर मांय नुवा कारोबार सरू करण रा इच्छुक लोगां ने विगतवार जाणकारी दी जावेला। आई.आई.एच.टी. रा निदेशक डॉ. शिव ज्ञानम बतायो कि इण कार्यक्रम रे माध्यम सूँ हथकरघा खेतर ने आधुनिक व्यवसायिक कौशल अर नवाचार सूँ जोडर प्रतिभागियां ने आत्मनिर्भता खातिर प्रेरित कर्यो जावेला। इण रे साथे ही वां ने बाजार रे अनुरूप हथकरघा खेतर रा व्यवसायिक मॉडल री जानकारी दी जावेला।

000

वायु गुणवत्ता प्रबंधन आयोग-सी.ए.क्यू.एम. दिल्ली एनसीआर अर आसे-पासे रे खेतरां मांय इण म्हीने होवण वाळी खेल होडां ने रोकण खातिर हुकम री कडाई सूँ अनुपालना रो कयो है। आयोग राज्य सरकारां सूँ कहयो है के शिक्षण संस्थावां, खेल निकायां अर स्थानीय अहलकारां रे मार्फत आ हुकम री कडाई सूँ पालना पक्की करी जावे। ध्यानजोग है कि सुप्रीम कोर्ट रा एक आदेश रे हवाले सूँ सी.ए.क्यू.एम. कयो है कि इण खेतर री खराब एयर क्वालिटी इंडेक्स ने देखता थकां आं आउटडोर खेल गतिविधियां रोके राखणे रा हुकम दिया है। प्रतिकूल वायु गुणवत्ता खिलाडियां रे स्वास्थ्य खातिर घणो खतरा पैदा कर सके है।

000

बूंदी रा तालेडा खेतर मांय आज एक सडक हादसा मांय तीन जणा री मौत व्हे गयी। दुर्घटना एक तेज रपतार ट्रक रे मोटरसाइकिल ने टक्कर मारने सूँ व्ही, जिण मांय मोटरसाइकिल सवार दंपती अर वां णो टाबर मौके माथे दम तोड दीयो। घटना रे पाछे ट्रक चालक मौका सूँ फरार व्हे गयो। वठी ने दिल्ली-मुंबई एक्सप्रेस-वे माथे सवाईमाधोपुर रे चौथ का बरवाडा इलाका मांय बीती रात एक ट्रक अर कार री टक्कर मांय दो जणा री मौके माथे ही मौत व्हेगी।

000

सेना दिवस जळसा रे मौके श्रीगंगानगर मांय आज ऑनर रन राखीज्यी। लालगढ़ जट्टन सैन्य स्टेशन सूँ स्टेशन कमांडर ब्रिगेडियर मनिक बटलवी ऑनर रन ने हरी झंडी दिखार रवाना कर्यो। घणे कोहरे अर तेज ठंड रे बावजूद टाबरां, युवावां अर पैली आळा सैनिकां उच्छास रे साथे इण मांय हिस्सो लियो। सैनिकां अर वां रा परिवारां रा साहस अर सर्वोच्च बलिदान रे प्रति सम्मान जतावण खातिर ऑनर रन राखी गई।

000

विश्व स्वास्थ्य संगठन अर आयुष मंत्रालय कानी सूँ 17 दिसम्बर सूँ वैश्विक शिखर सम्मेलन राख्यो जा रियो है। नुवी दिल्ली रा भारत मंडपम मांय होवण वाळा दिन रे इण सम्मेलन मांय दुनियाभर रा 110 सूँ बत्ती देशां रा मंत्री, नीति निर्माता, स्वास्थ्य विशेषज्ञ, शोधकर्ता अर डॉक्टर भाग लेवेला।

000